

Noas dae sa Regione. Formatzione, duos cursos pro su tzinema e is indùstrias creativas



Duos cursos de ispetzializatzione professionale arta dedicados a su tzinema e a is indùstrias creativas pro devènnere Dirigente pro sa sostenibilidade ambientale e tècnicu de iscena, sunt istados presentados sa chida colada dae s'assessore regionale de su Traballu, Ada Lai, durante una cunferèntzia de imprenta chi s'est tenta in Casteddu in is ispàtzios de “Sa Manifatura”, a sa presèntzia de is diretoras de

s'Aspal, Maika Aversano e de sa Fundatzione Sardigna Film Commission, Nevina Satta.

“Sa cultura dat traballu. Formamus is figuras profesionales noas rechertas dae su mercadu audiovisivu - afirmat Lai - ca petzi sa formatzione garantit su traballu. Su progetu formativu est su frutu de sa sinergia intre s'Assessoradu regionale de su Traballu, s'Aspal e sa Fundatzione Sardigna Film Commission e si còllocat in s'àmbitu de is políticas pro s'arta formatzione professionale mirada. Naschet, difatis, dae sa voluntade de prènnere sa distàntzia intre sa dimanda e s'oferta de traballu e sa mancàntzia, in su territòriu regionale, de figuras profesionales cualificadas pro operare in su settore tzinematogràficu e de sa creatividade. Is cursos - ispiegat s'assessore - ant a èssere realizados dae s'Aspal, su bratzu operativu nostru, chi si serbit de s'esperientzia e de sa cumpetèntzia de sa Fundatzione Sardigna Film Commission, chi at a sighire s'organizatzione e s'erogatzione de is cursos, in collaboratzione cun is parternariados natzionales e internatzionales.”